

→ MUKA SEPULUH

Minda Pengarang

Tabik Adib wira padam 'api kebencian'

Pemergian anggota bomba, Muhammad Adib Mohd Kassim, 24, di Institut Jantung Negara (IJN) kelmarin sebenarnya kematian untuk mempertahankan keamanan negara. Allahyarham bertarung nyawa lebih tiga minggu selepas parah dipukul pada malam kedua insiden rusuhan di Kuil Sri Maha Mariamman, Subang Jaya, Selangor pada 27 November lalu. Muhammad Adib dan pasukannya dengan berani memasuki kawasan berkenaan untuk memadamkan kebakaran kenderaan, tindakan yang boleh dibaratkan untuk 'memadam api kebencian' yang menjadi punca pergaduhan kumpulan penjenayah dengan penganut agama Hindu. Seluruh negara ini, tanpa mengira kaum dan peringkat umur, daripada rakyat biasa kepada pemimpin dan pihak istana, bersehid serta bersimpati dengan apa yang menimpa Muhammad Adib dan pasukannya. Namun, jangan pula ada pihak yang cuba menyalakan bara kebencian agama dan mengapi-apikan kemarahan orang ramai. Sejak pagi semalam, ada kenyataan ahli politik yang nampaknya agak keras dan cuba menangguk di air keruh bagi mendapatkan semula sokongan terhadap parti mereka dengan memanipulasi rusuhan di kuil berkenaan dan kematian Muhammad Adib. Beberapa individu pula menularikan 'posting' berkaitan isu berkenaan di media sosial hingga mendorong ulasan berbau perkauman.

Perbuatan provokasi begini mestilah dihentikan sama sekali kerana semua pihak patut mengambil iktibar daripada apa yang sudah berlaku. Kita tidak mahu timbulkan lagi kejadian jenayah yang boleh dikaitkan dengan perkauman. Cukuplah satu nyawa yang terkorban. Biar pihak berkuasa menjalankan siasatan rapi, mengambil tindakan susulan dan mengeluarkan kenyataan rasmi yang sudah tentu daripada maklumat yang sahih. Polis sudah pun menukar klasifikasi siasatan kes ini daripada cubaan membunuh kepada membunuh. Ketua Polis Negara, Tan Sri Mohamad Fuzi Hanun memaklumkan kematian Muhammad Adib kini di bawah mengikut Seksyen 302 Kanun Keseksaan. Kita percaya pihak berkuasa akan menjalankan siasatan dengan cara terbaik dan mengheret mereka yang terbabit ke muka pengadilan. Mahkamah akan menentukan nasib tertuduh. Jangan ada lagi kumpulan atau individu yang cuba membangkitkan sensitiviti kaum atau agama. Mungkin ada juga kewajaran kepada cadangan penubuhan Suruhanjaya Siasatan Diraja (PJCID) bagi menyiasat unsur jenayah yang membawa kepada kematian Muhammad Adib dan kejadian rusuhan di Kuil Sri Maha Mariamman. Kita percaya kerajaan akan meneliti semua cadangan dan membuat keputusan yang bijak.

Perdana Menteri, Tun Dr Mahathir Mohamad sendiri dalam Kenyataan Khas di Dewan Rakyat tiga hari selepas rusuhan menjelaskan, kejadian itu ialah perbuatan jenayah oleh pihak yang tidak bertanggungjawab, bukan membabitkan isu perkauman mahupun pertelingkahan agama. Perdana Menteri menegaskan mereka yang menjadi dalang atau cuba mengambil kesempatan akan berdepan dengan tindakan undang-undang kerana insiden seperti itu boleh membawa kepada masalah yang lebih besar membabitkan ketenteraman kaum. Keselamatan dan kestabilan negara ialah tanggungjawab bersama. Negara kita tanggungjawab kita. Ucapan takziah buat keluarga Muhammad Adib, Al-Fatihah. Adib, tenaglah di sana!

Bangkit Melayu, Bumiputera jadi lebih terhormat



Dari Kaca Mata

Prof Emeritus Datuk Dr Ibrahim Komoo

Felo Penyelidik Utama, Institut Alam Sekitar dan Pemuliharaan (LESTARI), UTM & Prof Kujangan GEOTROPIK UTM

Selepas Pilihan Raya Umum Ke-14 (PRU-14), Malaysia melalui pelbagai ketidak-tentuan dan perubahan di luar batas kebiasaan. Siapa yang menduga seorang negarawan berusia 93 tahun diangkat semula menjadi Perdana Menteri tertua di dunia.

Pada peringkat kepemimpinan Persekutuan dan negeri pula, ramai generasi muda yang belum pun mencecah usia 30 tahun diangkat menjadi menteri, timbalan menteri dan EXCO kerajaan negeri. Perubahan fenomena tabii. Perubahan drastik, kadangkala membawa harapan dan kemajuan baharu, tetapi boleh juga mengundang bencana di luar batasan.

Sebagai seorang warga yang mengamalkan budaya Melayu, beragama Islam dan mengabdikan diri untuk membangun negara tercinta Malaysia, penulis terpanggil untuk mengupas satu aliran baharu yang amat bahaya melanda bangsa Melayu seakan-akan kehilangan punca, bercakaran merebut kuasa dan menjatuhkan antara satu sama lain.

Jamin perpaduan

Kita sedia maklum, Tanah Melayu penduduk asalnya berbangsa Melayu, di Sabah dan Sarawak pula dihuni oleh Bumiputera. Apabila kita mencapai kemerdekaan dan bergabung menjadi Malaysia, Perikembangan Persekutuan telah menentukan falsafah dan tadbir urus negara serta warganya.

Secara semangatnya, warga ketika itu telah memutuskan beberapa ketetapan penting menjaga kepentingan bangsa Melayu dan Bumiputera bagi membolehkan negara terus berkem-

bang pesat, perpaduan terjamin dan kesejahteraan dikecapi.

Bangsa Melayu, walaupun setelah 61 tahun dipimpin oleh kepimpinan berteraskan Melayu, masih berasa terganggu, seakan-akan terpinggir dan dipinggirkan di tanah air sendiri. Isu utama ialah berkaitan kekuatan ekonomi yang masih terletak pada tangan warga berbangsa bukan Melayu. Kerajaan ketika itu masih kelihatan selesa untuk menjaga kepentingan Melayu atas alasan kekuatan politik masih pada tangan mereka.

Himpunan R12, iaitu perkumpulan bangsa Melayu terbesar menyatakan pendirian tegas tidak menerima ratifikasi Konvensyen Antara-bangsa Mengenai Penghapusan Segala Bentuk Diskriminasi Kaum (ICERD) walaupun kerajaan telah mengisytiharkan tidak akan melakukannya, tanda jelas aliran baharu mengenai keinginan sebuah bangsa majoriti yang mulai tertekan dan bangkit untuk berjuang mengungguli sebuah negara berbilang kaum.

Pulihara budaya, tradisi dan jati diri bangsa Melayu

Sejarah dan pengalaman sendiri menunjukkan ada bangsa unggul dibenci oleh warga dunia kerana ketasabutan menjaga kepentingan bangsanya sehingga sanggup menindas bangsa lain. Pada masa sama, wujud banyak bangsa hebat yang sememangnya unggul dan bertamadun tinggi, tetapi masih dihormati dan dikagumi ramai. Mengapa?

Bagi bangsa Melayu, anda bebas memilih apa sahaja parti politik, sama ada UMNO, PAS, Parti Pribumi Bersatu Malaysia (BERSATU), Parti Amanah Negara (AMANAH) atau PKR jika percaya kepada kepimpinan dan wawasannya. Begitu pun, keperluan berparti dan kepentingan memulihara budaya, tradisi dan jati diri bangsa Melayu ialah dua perkara berbeza.

Semua yang mengaku berbangsa Melayu perlu mempunyai ikatan persaudaraan dan nilai sepunya yang jelas. Perhatian diberikan kepada membina budaya dan tradisi sebuah bangsa terhormat, berkekuatan ilmu dan ekonomi, berakhlak mulia dan berpegang kepada budaya bangsa. Menghormati antara satu sama lain, dan tidak mengabaikan saudaranya di khalayak ramai.

→ Lihat Ms.11

Sidang redaksi

Ketua Pengarang NSTP
Dato' Yushaimi Yahaya
yushaimi@nst.com.my

Pengarang Eksekutif Kanan Integrasi NSTP
Saidon Idris
saidon@bh.com.my

Pengarang Eksekutif Berita Harian
Datuk Ahmad Zaini Kamaruzzaman
madzaini@bh.com.my

BH diterbitkan oleh The New Straits Times Press (M) Bhd, 31 Jalan Riong, 59100 Kuala Lumpur
Tel: 1-300-226787 Faks: 03 20567081
Laman Web: www.bharian.com.my E-mel: bhrencana@bh.com.my